

ChL 9117.1148

20

CHINESE-JAPANESE COLLECTION
HARVARD COLLEGE LIBRARY
FROM HARVARD-YENCHING INSTITUTE

~~19~~ OCT 11 1932



讀雍益集總述

吾師新城先生弱冠登

初官揚州以治行第一入為禮部古人之于是
官所相器重者必曰廊廟才宰相才有具美焉不
徒文詞之衣被當世足以盡其才名而已然先生
八歲能詩伯氏西樵吏部授以裴王詩法及在揚
州所交皆當世名賢高齋視事之暇金陵京口姑
蘇舟車遊覽之餘題詠滿大江南其庚子秋符升
辱收門下盡得受而讀之因集其順治丙申以來
至辛丑紀年之作較讎之為阮亭詩之刻此專集

所托始也久之先生復自取于三百餘首刪其什
六益以過江入吳白門前後諸集都為一編凡二
十二卷由是甲辰前廣陵所作乙巳後禮部所作
斐然畢備屬同門生王子我建鑄之吳門此漁洋
前集之再刻也康熙壬子秋祇奉

朝命典試益州有蜀道集二卷驛程記四卷其詩
高古雄放觀者驚歎比于韓蘇海外之篇戊午春
膺

皇上特達之知擢授翰林侍講尋下徵其詩錄三
百篇以獻謂之

御覽集未敢專行庚申冬拜國子祭酒

持官

膳部從遊無間晨夕乃更哀其辛亥迄癸亥之詩
得十六卷重為編次曰京集曰蜀集曰家集此漁
洋續集之三刻也甲子冬以宮詹受

命秩祀粵海有南海集二卷

符引

僭序其端而粵

行三志三卷皇華紀聞六卷廣州遊覽志一卷附
之此一時一地專為紀錄之四刻也方使車之南
行也雪阻東平望小洞庭中有蠶尾山為唐蘇源
明讌賞地因取以名其山房退食之暇合戊辰至
乙亥詩及碑版記序雜文為蠶尾集十卷而古文

詞之前此者復別爲漁洋文略十四卷雪苑宋先生爲之作序以傳此詩文合集之五刻也丙子春以少司農祇

命祭告西嶽西鎮江瀆有雍益集秦蜀驛程後記隴蜀餘聞各一卷蓋先生遊歷所至必討論其山川風俗古今人物之本末隴蜀既舊遊之地已詳具驛程記中而此又紀其所未備者也丁丑夏屬婁江通政錢公郵寄且以總序見委先生之言曰再使秦蜀往返萬里得詩纔百餘篇皆寥寥短章無復當年蜀道而海豪放之格然覽古興懷得江

山之助生色有加擬諸眉山集中所分紀行遊覽古蹟寓興諸篇殆兼而有之此又一時兩地再爲紀錄之六刻也其間驛程紀聞等書凡六種略如昔人隨筆總錄之例又有五言詩七言詩及唐賢三昧集唐詩十逸三書獨發明司空表聖嚴滄浪論詩微旨與詩集並行爲世所宗法此又先生諸集外之別刻也其他著述已成書者則又有國朝謚法考一卷池北偶談二十六卷居易錄三十卷五代詩話古懽錄各若干卷皆集外單行然則先生之才名之治狀所早見于江郡不盡于文詞

者施之大用正不可量而即此等身之業傳自名山固已章章若是於是諸大君子之論其詩者自蒙叟先生以下凡數十家足以觀詩家總萃之大意論其文者以謂原本經史斟酌唐宋卓然為一大家當以雪苑先生為定論此皆當代名流所共見共聞毋容門下士之更贊一辭者也特取四十年來請業于几席之前者歷為敘之聊志較讎之本末云崑山受業門人盛符升謹述時年八十有三

雍益集

哈佛大學漢和圖書館珍藏印

新城王士禎貽上甫

丙子春奉 命祭告西嶽西鎮江瀆出都

却寄李容齋相國陳說巖司徒彭羨門

少宰四首

早歷邛崃萬里程那知垂老又西征六飛正決平

戎策時駕將出塞九折寧辭叱馭行華嶽終南春浩蕩錦

江玉壘氣崢嶸山靈處處曾相識只怪秋霜兩鬢

生

年年待漏集修門滴盡銅壺笑語溫韋曲西來春

盍盍嘉陵南去雨昏昏蜀箋細字題清怨巴曲哀
音愴旅魂折得花枝相憶否梁州回首夢慈恩

十年兩度展明禋江海空餘汗漫身春老鷓啼催
入蜀年衰鶴病悔遊秦琴臺再訪當壚子簾肆重
過賣卜人興盡蕭然問歸艇碧雞坊外府江津

李長
吉詩鶴病
悔遊秦

年來有味是三乘著紫伽梨苦未能此日只如行
脚去歸來應似罷參僧百城煙水雲隨屨方丈跏
趺雪暗燈五月岷江新漲濶朝辭白帝暮江陵

過琉璃河

琉璃河上駐征驂柳疏水未蘸藍三十六陂春
水岍可憐渾不似江南

白河店謁椒山先生祠

墓在店北二里
去麒麟冢不遠

孤城初日上驅馬白河濱祠宇瞻喬木清流擷渚
蘋觸邪真獬廌守冢是麒麟
烈祖旌忠日光

輝四十春

順治十五年 詔刻忠愍二疏 御製
序文曰旌忠錄頌 賜廷臣今三十八年矣

新樂縣驛亭有感往事

古驛鮮虞國寒蕪新市城鶯花殊寂寞野水自縱
橫衣帶日以緩浮生還自驚敗垣蒼蘚合何處認
題名

藺相如墓

智勇存危趙相如第一人特書王擊缶間道璧亡
秦故國山河改孤墳草木春魯連終蹈海千古共
悲辛

真定題臨濟廢寺

欲問西來意因叅臨濟師主賓誰辨取棒喝任交
馳野鶻巢危塔行蝸上斷碑何因一莖草寶界現
琉璃

早發獲鹿縣

小邑淨如拭烟嵐朝打圍忽忘行役遠只似故山

歸瀑水侵官路清流浣客衣溪邊鳧雁喜拍拍泛
晴暉

自獲鹿至井陘道中雜咏四首

纔過鹿泉上呀然開土門崩崖一綫路喬木幾家
村障日山多暝浮嵐晝易昏聞雞已亭午身在武
陵源

少日紛多慨龍門太史書劫殘秦復趙齒冷耳兼
餘豈謂無雙士而師李左車到頭鐘室恨功狗竟
何如

冶水三冬煖西來燕尾斜似聞藏硯石小住問丹

砂急瀨喧危狎踈林卧斷槎魚牀將蟹堞隨處可
移家

斷岼雷方殷奔瀧雪又飛魚驚如避笱鷗下未忘
機贛石何遷次瞿塘定是非倦遊三萬里誰為寄

當歸

子壬子入蜀甲子入粵及茲丙子
再使秦隴及蜀凡行三萬餘里矣

次井陘縣

千嶂通關路雙溪遶縣門亂流爭浦漉水碓聒朝
昏夕照魚蝦市寒烟桑柘村當年穆天子雨雪獵
高原

故關

絕塞依天險雄關鎖地維石橫千仞壁松偃萬年

枝盡日無飛鳥經春卧老熊見北史槐花秋雨裏重憶

舊題詩

壬子秋過此有句云西風忽
送瀟瀟雨滿路槐花出故關

度故關感懷亡友葉文敏公

壬子秋于此
賦二詩寄葉

拄笏迎朝爽看山拂帽羣

舊詩云冒雨
看山拂帽羣

風生土囊口日

射太行雲往事浮烟散心知落葉分何時玉峰下

宿草酌孤墳

平定西道中即事

伏流處處瀉驚湍赭石荒岡眼倦看何似小園松
竹下玉螭乘月吐清寒

祁縣訪戴楓仲見其子永豐今記知以壬
申歲逝矣輓之一首

麓臺山畔已深春侯甲河邊起暮塵耆舊百年誰
碩果江湖萬里慣勞薪子自謂也楓丹笠澤思漁父草
綠昭餘酌故人一笑倚歌揮手去嗟來桑戶返于

真

子音為楓仲作丹楓閣長句引張志和夢楓
樹生腹為比又為賦天馬鼎多父敦二歌

韓侯嶺題壁

烏喙那堪共良弓久自藏一軍驚大將千古痛真
王勢已歸諸呂何勞守四方世家誰載筆讀史淚
霑裳

趙城道中懷門人黃自先張漢瞻周策銘

殷彥來蔣靜山諸子兼寄幔亭弟

白首京華七見秋田園蕪沒未歸休陽關又盡一
杯酒蜀道重尋萬里遊遙憶美人隔湘水頗衰老
子困壺頭苦思下澤車中語慚愧平生馬少游

洪洞縣謁韓忠定公祠

弘恭已自收蕭傅夏惲翻能殺呂強枉使空同奮
刀筆子規不勸李東陽

過臯陶廟偶感范滂事題壁

汝南范孟博高義薄雲霄未遂澄清志先逢黨錮

朝大名齊李杜幽憤祭臯陶南北甘陵部千秋恨
不消

平陽懷古戲作

漢宮貴主顏如花何異婁豬求艾豨漢家將帥亦
無種昔為騎從今同車鄭季長孺是何物一朝門
戶生光華生兒願得如衛霍悔不給事平陽家

猗氏縣衛爾錫中丞見過賦贈

鴨綠江頭絕鯉魚今孤城畔攬君袂聲名京兆三
王後衛先為京兆尹涕淚中山滿篋書都護夜郎餘部曲神
人姑射本清虛從今晏坐消殘劫一室何妨自埽

除

郭有道墓

介休縣二首

大槐坂上逐車塵爭效先生折角巾至竟清流解
亡國望門投止是何人

謁文忠烈公祠

精神如破貝州時晚節猶能動四夷天遣不同韓
富沒姓名留冠黨人碑

風陵渡河抵潼關

行盡并汾路前旌欲度關亂帆河曲水隔岍虢州
山地險煙嵐合時清虎豹閑永懷黃綺侶白首卧

商頽

訪山史讀易廬時久客淮南未歸

多年華下遂君初廿載重過訪舊廬滿徑苔痕侵
竹石當牕嶽色淨琴書山中宰相人誰識江左夷
吾我不如為報倦遊歸及早淮南無此好家居

華山雜詩七首

玉泉院

目玩玉泉流靜悟先天易多事墜驢時強與人間
事

山蓀亭

結茅孤石稜玉泉下奔注亭空泉尚流上有無憂
樹

希夷峽

洞門峽半開鐵鎖垂千丈俗駕自然迴何地容種
放

娑羅坪

小憇娑羅坪手撫娑羅樹仰見上方雲時向人間
去

毛女洞

毛女負琴去倏然松杪飛青冥風露冷鬢鬚見天

衣

白鹿龕

雲中跨白鹿心知魯女生乞我一丸藥相將遊玉清

青柯坪

窈窕青柯館正在西峰罅二十八潭懸飛瀑從天
下

青柯坪迴喜吳天章至自朝邑

昨過風陵渡思君役夢魂暮雲低華嶽春水下龍
門轉徙猶三輔艱難共一樽何時逢玉女同到洗

頭盆

謁郭忠武王祠

華州
二首

便橋蕃部擁風雷單騎纔臨鐵騎摧回紇萬人齊
下拜傳呼天上今公來

謁寇忠愍公祠

柘枝舞罷蠟成堆千束吳綾夜宴開不是魏三詩
句好誰知無地起樓臺

新豐

漢代粉榆社遺墟極望平空提三尺劍忍啜一杯
羹細雨新豐樹寒蕪小苑城惟餘舞陽廟漠漠土

花生

驪山温泉

曾過繡嶺弔開元廿載華清役夢魂老大不關興
廢感重來只似洗腸源

秦始皇冢

下錮三泉銀作池一朝禍發牧羊兒不知地底連
機弩曾射周章百萬師

石甕寺

在驪山
東繡嶺

當年石甕寺曾對集靈臺青雀無迴信黃虬是禍

胎

杜詩化作長黃虬謂祿山也

朝雲何日散山月至今來坐久流仙

梵松聲薄暮哀

灞橋

自古銷魂地茫茫喚奈何行人灞陵渡踈雨櫟陽
過楊柳籠煙薄桃花夾岍多邯鄲東北望流恨滿

雲和

即漢文帝令慎夫人鼓瑟處

灞橋柳

灞橋楊柳碧毵毵曾送征人去漢南今日攀條憔悴絕樹猶如此我何堪

城南遊詩十首

曲江

賜沐逢修禊宜春歲歲遊傳呼夾城仗早御望仙樓捧劍金人曲凌波綵鷁舟新蒲將細柳蕭瑟至今愁

慈恩寺

昨日櫻桃宴今朝鴈塔行紅綾新賜餅淡墨舊題名柳汁年年綠桑田歲歲更殘僧空劫後相對話無生

薦福寺 即聖容院今名小鴈塔

院從唐代建人以寂音傳 洪覺範嘗居此 水鳥皆聞法雲山不離禪花邊停浴鼓竹外起茶煙即此忘言說虛

空借坐眠

韋曲

皇子陂邊路風光韋曲多曾鄰天尺五最近第三坡芳草新年色桑條舊日歌傷春更懷古容易醉顏酡

杜曲

春衣杜陵宿窈窕一川花舊是岐公宅人傳故相家名園三品石貴主五雲車今日穠華歇棠梨噪暮鴉

牛頭寺

牛頭鐘梵罷露坐俯樊川
明月生秦嶺清光滿稻
田微風喧吠蛤野燒起
山煙歸卧禪燈寂心空
古佛前

少陵原工部祠

少陵原下路髣髴浣花村
猶似開元日終南對國
門秦川空望眼湘水與
招魂忍見桃花落紅英
糝綠罇

樊川桃花

三月樊川路紅桃散綺霞
終南青送黛滴水碧穿
沙草色裙腰合渠流燕
尾又銷魂過杜曲一樹
最

天斜

杜曲南鴻固原下
緋桃一株方盛開

鄭莊

杜陵客西蜀常憶鄭瓜州
望古尋遺蹟逢人問故
侯有才三絕擅無恙八
川流近交相望韓莊近同悲
貉一丘

秦愍王墓

陳王鬪雞道今日望陵園
石馬前朝賜銅人漢代
原幽蘭悲帝子芳草怨
王孫猶有藍田燕年年
入墓門

杜曲西南弔牧之冢

兩枝仙桂氣凌雲落魄江湖杜司入
勲今日終南山色裏小桃花下一孤墳

咸陽懷古

燕丹報秦仇其志良已大志士不謀身豈必論成
敗一哭馬生角天意若有在交龍為扶輦機橋詎
能害奈何衍水匿骨肉割深愛帝醉顧飛廉四海
遂橫潰徒惜劍術踈千秋發長喟

茂陵懷古

頻年祠太乙晚歲罷輪臺緱氏仙何往瑤池信不
迴紅顏鈎弋盡白首子卿哀失勢秋風客昆明又

劫灰

李夫人冢

在茂陵西
止數步

長門買賦草萋萋冤魄雲陽杜宇啼惟有佳人解
傾國茂陵長傍茂陵西

楊妃冢

怨粉愁香委路岐祇留羅襪使人悲梨園教就霓
裳譜不似三鄉陌上時

扶風縣早發

車馬扶風道春光冷似秋雲峰會岐下雨脚插梁
州寥落鶯花日蒼茫汧渭流前程兼隴蜀萍跡信

悠悠

馬融絳帳村

絳帳風流蹟尚傳不聞長笛但荒煙李公已為飛
章死何用區區妬鄭玄

岐山謁周公廟

廟中有潤德泉

元聖祠堂在娑羅覆殿陰

初旁娑羅樹最古

岐周遺俗古碑碣

歲時深故國千秋祀豳風七月心靈泉聽不盡三
嘆有餘音

秦穆公墓

雨霽陳倉曉日紅
杖藜來訪橐泉宮
千年斷碣荒

煙裏一片殘春秀
麥中黃鳥哀時良
士盡碧雞飛

去霸圖空子車遺
冢猶鄰近長與坑
儒恨不窮

雨中式貞菴督學招集東湖

行人衣上雨來自
杜陽川湖似郎官
好名因學士

傳

有坡公祠

游儵爭唼雨垂柳
欲生烟重過荷香
裏還

勞運酒船

元次山詩不能廢人運酒舫

再集東湖拜東坡先生祠

復有東湖約來當
春暮時涼風散高
柳微雨灑清池自
識龜魚樂何殊濠
濮思仙翁去千載
髣髴下雲旗

汧陽縣

晚上汧陽閣遠山橫翠眉

韋莊汧陽詩遠山如畫翠眉橫

川長連隴首

城古枕隄糜太尉千秋笏

段公秀實汧人

韋郎七字詩不勝

懷古意羌笛暮休吹

登隴二首

隴頭有流水嗚咽至今寒只自流離下那知道路

難秦川已迴望齊瑟向誰彈東道三千里無因託

羽翰

登隴人回首臨關馬顧羣

唐人句

遠遊今到此出塞古

常聞不見梅花使惟看隴水分故園渺東海愁絕

萬重雲

隴州縣頭鎮古吳山縣也有元縣今丁帶

十詩愛其似姚合武功雜咏恐其湮沒

表出之

瀟灑吳山縣

丁十詩皆以此句為起

猶傳仙今辭那知煙草裏復

見武功詩過客詢殘堞田家補廢籬當年杜元凱

峴首亦沈碑

登吳嶽

名嶽標西極金天作鎮雄東看連太白北望盡回

中日出橫秦時煙消指漢宮導岍思禹績此地鑿

鴻濛

吳山瀑布泉二首

沂山新望秩曉色五峰晴初日林端豁飛泉樹杪
行尋源經絕壑臨水濯塵纓寂坐丹厓裏身疑在
碧城

望輦峰前路陰厓樵牧稀千尋雙瀑下十笏萬山
圍水石含秋色雲霞變夕霏靈湫有神物金碧射
人衣

祀雞臺

寶雞縣
三首

東周久已換西秦陳寶何須辨偽真猶有漢家使

持節益州遠祀碧雞神

鳳女臺

弄玉空祠鎖寂寥碧雲天際水迢迢丹青不畫乘

鸞女夜夜月明聞洞簫

賣酒樓

東坡
有詩

昨向宜春下苑遊曲江煙景似悲秋珠簾甲帳皆
黃土何必陳倉賣酒樓

寶雞縣南入棧感成

碧油幢引向西川取次重過二十年壁壘又經新
戰伐奮威將軍
破賊于此關河不改舊風煙陳倉五夜荒雞早

錦水三春旅夢懸
長白山前一茅屋
何時送老白雲邊

棧道雨

漠漠天將雨
沈沈日又西
林間畫眉鳥
更作盡情啼

鳳縣西溪金絲柳二首

宋苑金絲柳
傳來自鳳州
經時未憔悴
烟態拂人頭

絲拂金明水
根移太乙宮
東京夢華後
何似此山中

紫栢山下謁留侯祠

相傳是辟穀處并祀黃石公赤松子

萬木蕭蕭風晝吹
深山忽見留侯祠
清流白石閱今古
雪柏霜筠無歲時
辟穀真從赤松隱
授書偶作帝王師
也知烏喙逃勾踐
未屑鴟夷學子皮

聞紫栢山絕頂有峨眉老衲獨坐丈室數

十年蛇虎皆馴伏
今九十有六矣惜不

得其名字乃作頌古十絕句屬鳳今寄

之丙子歲四月七日棧中留壩驛燈下

成

維摩詰

師利多言說淨名殊默然語言文字外已示祖師
禪

須菩提

善哉須菩提巖間惟晏坐般若是誰聞諸天雨花
墮

惠持

樹中入定僧千年人不識如何去陳留一往無消
息

道超

我愛道超師絕俗耽懣寂退院間無人蟋蟀鳴秋

壁

寒山

寒山牛跡話此意誰酬酢趙州小廝兒宛有大人
作

懶殘

煨火傍羣牛謫來幾千歲懶殘亦俗人誰能為拭
涕

地藏琛禪師

栽田博飯喫獨振玄沙道一笑視諸方說禪方浩
浩

法昌遇禪師

法昌亦開爐單丁唯一箇賴有十八賢緘口圍爐坐

黃龍晦堂禪師

山谷大辯才妙義皆糠粃滿院木犀香吾無隱乎爾

袞禪山僧

見冷齋夜話

枕石漱溪流夢見歐陽子覺來萬壑風松聲滿人耳

汎漢江

廣川微雨過疊鼓發中流白獺啣魚上青峰捲幔收江童竹枝曲漢女木蘭舟歸路重城晚紅燈滿市樓

大安驛雷雨

客行當四月驟雨過三泉出地雄雷奮穿雲急瀑懸飛龍氏舊國白馬戍西偏潭毒關前壘英風尚颯然

潭毒關宋劉子羽退敵處

百牢關

全秦雄百二南盡百牢關人雜氏羗俗天連彭濮山漢臣傳諭蜀唐計失征蠻歷歷前朝事孤雲落

照間

嘉陵江上憶家

自入秦關歲月遲
棧雲隴樹苦相思
嘉陵驛路三千里
處處春山叫畫眉

龍門閣

潛水入嘉陵江處即龍洞背亦名葱嶺

四圍碧玉色
峻嶒著箇行
纏盞飯僧松
末風來龍背
冷坐看流水入嘉陵

籌筆驛

朝天峽上

當年神筆走羣靈
千載風雲護驛亭
今日重過弔陳跡
祇餘愁外舊山青

意中流水遠愁外舊山青石曼卿題籌筆驛句也

飛仙閣

山行喜乘流
江平況如練
萃萼有開闔
竹樹一蔥蒨
人言利州風
今朝冷然善
灘如塗毒鼓
舟劇離弦
箭仰眺飛仙閣
鳥道危一線
彎環歷三朝
向背窮九面
絳雲卷輕綃
白日遞隱見
嘉陵碧玉色
晴雨皆婉變
想見吳道玄
應詔大同殿
此生兩經行
天遣追勝踐
醉帽停烏奴
已泊益昌縣

蜀諺云利州風雅州雨

飛仙閣口號

丹頂朱砂玉雪翎
朝遊沙苑暮青城
前身恐是雲中鶴
曾喚仙人徐佐卿

汎嘉陵江至益昌

今昭化縣懷何易于

益昌古利州由來五達衢白水合嘉陵山谷相盤
紆我有汎舟役萬里經川塗望古懷清芬所思何
易于刺史乘春下畫鷁盛嬉娛前舟載賓客後舟
羅笙竽索民為挽舟牽絳須百夫縣令腰笏前挽
舟自先驅刺史驚問狀縣令乃前趨方春耕且蠶
民力方勤劬令適暇無事可以充卒徒刺史聞之
慙上馬如亡逋仁人重一言能使民力蘇考獻徵
樵文撫之載唐書累百守今中尚有斯人無作詩
告有位磬石鑿山隅

晚至昭化縣題孔令見野亭

葭萌朝掛席弭棹欲三更月上嘉陵水山圍漢壽
城主人具雞黍邀客啟柴荆修竹吾廬似因之故
國情

登牛頭山

連峰去不窮萬壑寒空向下惟看鳥憑虛但御
風身投巴徼外日極雪山東五畝湖邊宅何年著
退翁

牛頭山

其上天一握其下潭萬丈峨峨牛頭山排空削千

嶂盤盤石磴危，鈎梯絕依傍。路與風雲通，人出飛
鳥上。全蜀萬山圍，四顧迷背向。歸雲盪胸來，浩呼
洶濤浪。有如泛香海，一葦凌滉漾。夔蝻爭逢迎，鬼
神獻情狀。咫尺即岷峨，此亦堪輩行。

入劍門

銅鶴香浮 玉座溫七年 講幄奉明恩 此身未
了 詩中畫 細雨騎驢又劍門

放翁詩細雨
騎驢入劍門

劍門關

鎖鑰川東北，雄圖自鬻靈。一關橫碧落，雙劍插青
冥。驟雨蛟龍逼，驚風草木腥。無才繼張李，不敢勒

新銘

劍州夢蔣虎臣先生

壬子秋入蜀先生在峨
眉是冬示寂伏虎寺

巴蜀重來雪鬢增，夢餘古佛歛嘉陵。手中跣跳紅
藤杖，劫外逍遙白足僧。七祖門庭叅北秀，百城煙
水訪南能。兜羅繇界如相待，同踏峨眉絕澗冰。

郎當驛雨中二首

金雞賜帳事披猖，河朔從茲不屬唐。却使青驪行
萬里，三郎當日太郎當。

武連縣南雲氣遮，郎當驛北石槎枒。西風盡日濛
濛雨，開徧空山白芟花。

長卿山

相傳相如讀書處明皇賜今名

漾舟潼水碧潺湲一抹青峰想玉顏留得文君好
眉黛薄雲初散長卿山

晚渡涪江

涪江江水抱山流不見唐家帝子樓記取江東詩
句好澹烟喬木是緜州

緜州漁父村相傳是涪翁故居

越王樓閣已成空州府荒涼苦竹藂猶有煙波漁
父里芙蓉溪上弔涪翁

鹿

抱郭涪江碧玉流一川豐草鹿呦呦倦遊忽憶楊
岐語祇有渠儂得自由

猿

蜀道山猿樹樹懸栗皴開處一林煙六牕不遣獼
猴靜漫說愁猿學四禪

羅江驛夜雨

故縣也今省入德陽城北有潺湲亭

前旌已拂鹿頭關風雨勾留不肯閑何處行人最
愁絕潺湲亭下水潺湲

落鳳坡弔龐士元二首

白馬關前夜雨涼斷碑空在漢祠荒一羣鸚鵡林

間語似憶當年孤鳳皇
沔上風流萬古存魚梁洲畔向江村何如但作鴻
冥好采藥相攜去鹿門

午日張成都譚敘州王遵義三太守招集

浣花草堂

故人相見錦官城五月黃梅雨乍晴真向西川觀

競渡國師休叱野狐精

戲用南陽忠國師事

謁漢丞相忠武侯祠

碧雞坊外路丞相古祠堂井絡猶天漢穹碑自盛

唐

裴碑
柳書

當年紛野祭異代肅丞嘗慘澹風雲會悲

歌激大荒

昭覺寺贈佛寃禪師

禪窟偶經行逢師萬慮輕大都明祖意何必太僧
生掌內摩尼影堂頭毒鼓聲灼然賓主句無復下
牀迎

題淨居寺清風亭

修篁江寺古荷芰水亭幽欲悟無生忍寧從半字
求菩提本無樹般若亦非舟只自忘言好虛空笑
點頭

淨居寺謁宋文憲公祠

在文殊院

一代高文奉至尊那知投老葬蠻村祇應迴向文
殊境共證昆耶不二門

浣花草堂懷少陵
倉皇行在日轉徙蜀山時王業悲諸葛比鄰得斛
斯窮途聊慢世曠代一稱詩橘刺藤稍徑重遊亦
夙期

成都懷古四首

司馬相如琴臺

長卿但好色慢世亦何有奈何滌器處風流映身
後快意駟馬歸王孫獻牛酒

揚雄墨池

子雲拒富人風義凜當世何物國師兒乃許問奇
字墨池久荒涼四賦空巨麗

嚴君平卜肆

君平神仙流賣卜亦偶爾蕭然日下簾心契希夷
旨我讀指歸論悵望成都市

李衛公籌邊樓

武侯籌筆驛衛公籌邊樓兩賢不並世風烈俱千
秋功高竟不賞海外志窮愁

漢州西湖

當年房次律此地鑿西湖百頃烟波渺中流島嶼
孤琴亭何寂寞片石亦榛蕪欲問邢和璞三生事
有無放翁房相西湖詩遶城鑿池一百頃
島嶼屈曲三四里房公石尚存州廨

漢州紀夢

照壁孤檠不自聊隔牕寒雨打紅蕉驚回一枕鄉
園夢身在西川金鴈橋

雨下牛頭山二絕句

冒雨下牛頭眼落蒼茫裏一半白雲流半是嘉陵
水

衆山遶嘉陵白雲如玉城江山不相負幸自可憐

生

千佛巖

江作大圓鏡山爲寶樓閣莫遣丹霞聞木石總燒
却

利州皇澤寺則天后像二首像是一比丘

尼

鏡殿春深往事空嘉陵禍水恨難窮曾聞奪塔瑤
光寺持較金輪恐未工洛陽伽藍記瑤
光寺尼工奪塔

瓦官寺裏定香熏詞客曾勞記錦裙今日蘭橈碧
潭上玉溪空自怨行雲李義山利州江潭詩欲就行
雲散錦遙自注感孕金輪處

金牛峽滴水巖

峽口羣峰似鐵圍半空晴雨落霏霏陰谿樹合疑
無路鬼蝶如輪自在飛

峽中多蝶視常蝶大倍之

定軍山謁忠武侯祠

朝登武侯坪遙酌丞相墓渺渺漢川流羣山莽迴
互背臨巴蜀道前指梁洋路髣髴漢官儀再拜冬
青樹

黃沙驛

稻畦方罫一渠通雨足村村樂事同白水滿塘秧
正綠吳牛閑卧柳絲風

界牌關道中

馬鞍嶺上

修竹覆竒壁飛泉來半空人行翠微裏風度紫蘭
藜暫喜俗塵遠休嗟吾道窮誰為洪谷子移向畫
圖中

四過東湖題宛在亭

小鴨唼喋萍葉亂三枝五枝菡萏開魯連陂上花
千頃黃帽刺船歸去來

重題茂陵

絡繹甘泉豹尾催君王夜幸栢梁臺當時譎諫稱
方朔也雙長陵宛若來

謁段忠烈公祠

昭應離宮盡廢丘司農祠廟儼千秋
流芳遺臭知何限火迫當年笑鄴侯

早發臨潼

輦道虛無裏孤城翠靄間
西南迴望處滿眼是驪山

華州西溪

往來宮柳路纔訪鄭南坻
水木清華色雲峰澹宕姿
江心伏毒寺花外拾遺祠
右字美祠不見松談閣松

風日暮吹

郭脢伯宗昌松談閣在溪上今廢

泚園弔郭脢伯二首

脢伯園中置一舫居之名齋舫

白厓湖水碧浮天亂石嗟峨凌紫烟
十里芙蓉衆香國此中曾泊孝廉船

大華小華皆削成東溪西溪夾鏡明
仙人鶴背忽飛去天風下來聞玉笙

鼎湖原二首

軒轅鑄鼎此荆山弓墮龍髯不可攀
多事橋陵一坏土伴他鴻冢在人間

素女為師態萬方如聞天老教軒皇
馬肝已諱文成死又見神君祀栢梁

盤豆驛

依然盤豆對藁蘆
回望關門岳勢孤
思子臺邊一懷古
不知身過玉孃湖

湖城二首

今閩鄉

泉鳩里畔動悲風
回首秦山隔萬重
仙意已窮巫蠱起
茂陵遺恨大臺宮

趙鹵誰教近至尊
漢庭不照覆盆冤
如何病已為天子
惡謚重蒙到茂園

號略鎮

古號州

號略城邊驛路斜
西亭送客指天涯
商山如黛青

千疊掩映桃林萬

樹花

古桃林地桃花尚數十里

稠桑驛

感張淑人陳孺人而作

春蘭秋菊不同芳
舊恨新愁爾許長
應是三生緣未了
又呼妙子到稠桑

舊函谷關

靈寶

白馬東來開象教
青牛西去入流沙
至今冠蓋東西客
起候雞鳴到日斜

老子故宅

北邙東望冢纍纍
上有玄元古廟基
莫以荒唐笑仙李
漢家先奉濯龍祠

次陝州

首春發京國秋氣忽蕭蕭
路入三川險人歸萬里遙
黃河流砥柱白日下中條
河上傳經叟仙蹤不可招

甘棠今陝州

弭節甘棠日未晡
玉釵金縷散青蕪
殺陵此去多風雨
不用尊前唱鷓鴣

許渾有甘棠聞唱鷓鴣辭詩

甘棠驛

北寺南牙劇戰爭
可憐甘露怨誰明
甘棠驛外東流水
嗚咽年年寒玉聲

事見甘棠靈會錄

魏野草堂

陝郊樓隱處寥落
對雲山無復花藏縣
曾聞菊遶灣二句用野詩
偶歌紗帽出時跨
白驢還尚憶汾陰祀
流

風杏莫攀

雨度硤石

函關東望勢嵯峨
北顧洪濤俯大河
自昔雲山三晉壯
至今風雨二嶠多
國殤白骨埋幽草
山鬼清秋帶女蘿
想像秦聲思蹇叔
夏臯陵下一悲歌

會盟臺二首通池

秦聲趙瑟會西河
御史前書較孰多
臨訣數言關

大討論功終欲首廉頗
不辭頸血濺秦王進在當筵氣慨慷十五名城酬
趙璧何如談笑請咸陽

新函谷關

新安

建瓴形勢壓河潼六國逡巡百二雄楊僕移來定
何事妬他昭屈在關中

風香莫洛陽

國本爭來黨錮連楚歌楚舞亦堪憐如何鴻鵠高
飛去又見蒼鵝出地年

望龍門香山寺懷白傅

神女浦前眉月上窈娘堤畔臉波橫輸他六十河

南尹五度香山雪後行

白詩五望
香山雪

渡洛水

脉脉中流望盈盈羅襪塵西園魏公子南浦洛川
神蘅薄芳猶在楊林意未申凌波何處問秋水正
魚鱗

洛神

凌波羅襪欲生塵賦裏驚鴻態尚新不信三臺燈
火夜針神真比洛川神

洛川南望

碧嵩清洛洗愁顏伊闕中分兩髻鬟煖翠浮嵐看
不盡緱山南是伏牛山

白馬寺

伽藍半化洛陽塵漢代鴻臚跡尚新太息他年窮
楚獄仁祠空解祀金人

王輔嗣冢

鍾會齊名果是非白楊孤冢夕煙微如何一夕談
名理不救河橋誤陸機

緱氏縣今偃師

白茅授印事何如底許孫卿更上書桂觀蜚廉人

力竭祇緣仙子好樓居

望緱山廟

王子乘鸞鶴飄搖伊洛間至今明月夜鳳吹滿空
山緱氏仙踪杳東萊漢使還樓居高幾許天路渺
難攀

七夕前二日鞏縣阻雨

大火西流日昇仙故跡存王子晉以七月七日上昇秋風來鞏洛暮

雨阻轅轅欲把浮丘袂難招杜甫魂工部葬首陽山神嵩不

可眺三十六峰昏

宋陵鞏縣

洛水邙山飽廢興
宋家幽寢闕魚燈
奉香不見臨安使
白日茫茫下七陵

七夕雨抵汜水縣

玉門殘壘外云是古成
臯濁浪喧牛口雄關
偪虎牢青山空楚漢
白骨尚蓬蒿七夕風
兼雨悲歌撫孟勞

紀將軍祠

榮陽

東門黃屋競傳呼
從此咸陽入帝圖
若遣封侯身不死
也須鐘室避娥姁

夕陽樓

鄭州三首

野塘菡萏正新秋
紅藕香中過鄭州
僕射陂頭踈雨歇
夕陽山映夕陽樓

僕射陂白蓮

陂名傳僕射秋氣滿
蒹葭十里銀塘冷
千枝白豔斜他年
履道宅應憶管城
花素手誰攀折飄
零自

水涯

鄭州古管城

圃田列子祠

泠然鄭圃御風遊
四十年如不繫舟
惘悵餘年還嫁衛
先生老矣又何求

官渡

別駕亡來萬事非夕陽官渡客行稀
袁家新婦應惆悵賸與陳王詠宓妃

中牟縣南湖蒲盧亭是張林宗飲酒處予
易名墊巾題一絕句

南郭孤亭野水濱菰蒲獵獵水鱗鱗
林宗未遠風流在不愧亭名是墊巾

板橋

板橋衰柳日蕭蕭回首宣和似暮朝
上巳金明池上飲畫船銜尾駱駝橋

昭靈夫人墓

驚風古道卷蓬根何處昭靈墓尚存
不見梁巫陳桂醕野人耕盡小黃園

良嶽遺址

內殿傳聞燕親

去聲唐人詩人
主人臣是親家

家香風千樹引梅花玉

華閣裏分明見不羨堂名萼綠華

謁信陵君祠

趣救邯鄲却暴秦十年留趙事酸辛
大梁歸後匆勿甚日飲亡何近婦人

曹門李中丞蒲陽偕藩臬諸公餞別

梁園送客覆清樽雲作魚鱗日氣昏
劍客廟前相

問訊抱關非復古夷門

曹南渡河望南華山

函關已弔玄元宅鄭圃還過禦寇家問渡漆園風
雨裏却臨秋水誦南華

春城堆

金鄉晉祁公故宅

春城堆上弔諸邠絕恨參軍入幕時只有青溪三
十曲風流猶自憶僧施

南陽聽歌

七載離筵喚奈何玉壺紅淚斂青娥瀟瀟暮雨南
陽驛重聽吳娘一曲歌

雨登太白樓

開元陳蹟去悠悠猶有城南舊酒樓吳語曾呼狂
太白洛陽何必董糟丘龜鳧縹緲當牕出汶泗蒼
茫遶檻流眼底無人具賓主任城煙雨可憐秋

南池

南池風景地微雨墊巾來盡日聞蟬語無人共酒
杯一亭楊柳暗四面芰荷開萬里橋西宅新經蜀
國回

龍女祠

汶水北岸

冰綃霧縠映迴波半額宮黃感黛蛾欲采香蘋慰

幽怨不須深避庾毗羅

雍益集終

男啓涑

啓汭

啓汭

孫兆鄩兆鄭全較

雍益集書後

丙子春二月吾師漁洋先生奉

命祭告西嶽江濱仁錫走謁先生於邸第曰先生

昔典試成都以蜀道名集至今衣被海內茲使節

歷舊游必繼蜀道成集發揮名山奧區未盡之蘊

先生憮然曰余自壬子入蜀甲子使粵以及此行

每值于歲輒有萬里之役今筋力就衰興味蕭索

思棧隴之崎嶇江漢波濤之洶涌陰雨雲物之霖

霽詭變時代歲序之推遷猿鳥之啼吟叫嘯草之

蒙茸木之蒼蔚實有神傷心悸不欲復見者恐不

能如年少氣盛時出佳句排冪以與山靈相雄長
矣一座皆低徊感愴迨秋九月既竣事先生復
命於朝仁錫亟請先生近詩授梓冀得在校錄之
責挂名末簡先生因出雍益集以示且告之曰秦
蜀之竒句詩殆盡茲特補所未及爾老耽禪寂遇
事短吟略如竺氏頌偈不應更作文字觀也子其
爲我序之仁錫避席而跽踧踖不敢當先生曰昔
李漢蘇軾非韓歐陽之門人乎然皆序其師之文
在當之者不以爲諂頌之者不以爲僭子奚辭仁
錫曰否不謂是也夫大小不同量賢愚不齊勢理

之自然也今先生之詩陶鑄萬有籠蓋一切上自
風騷漢魏下迄三唐兩宋靡不貫穿包舉淵然如
海之涵悠然如地之負在論者或指曰超詣曰雋
永曰沉鬱頓挫皆各就所見之一偏以強名之若
舉其全體則自有所以爲先生之詩者在也是集
今體小詩居多先生方歆然自以爲不足然皆泓
澄困泣原本深厚所謂盡卷波瀾者也豈能以語
言跡象詮述哉由斯言之先生之詩實無愧昌黎
廬陵而仁錫之身陋不逮蘇李其爲大小賢愚較
然矣江東計甫草先輩文章妙一世猶言欲序先

生之詩一月而不成至等之於登泰岱觀孔子廟
堂詩皆欲有待而後爲其鄭重如此今仁錫學識
鄙淺自知不足舉其意若妄操數寸之管而強爲
之是誠甫里之罪人欲不爲作者所詬訕難已梓
旣成因次前後答問之語敬復於先生以申始終
不敢輕序先生之詩之意康熙三十六年歲次丁
丑七月之望門人析津蔣仁錫謹書

